


**Preseten Henry B. Eyring**

Aewin Chon Aninis  
non ewe Aewin Presetensi



# Kinamwe non Ei Manau

**N**genikich meinisin ekkewe sia fen feito non ei manau iei, ewe Chon Amanau a apasa, “Fonufan epwe eriaffou kemi” (John 16:33). Nge inamo I a fen ngeni noun kewe chon kuno ei pwon mi amwarar nupwen an we angang won fonufan: “Upwe ngeni kemi kinamwe, upwe fang ngeni kemi pwisin ai kinamwe. Ai fang ngeni kemi esap ussun an fonufan fang ngeni kemi” (John 14:27). Mi ew kinamwe ach sinei pwe ei pwonon an emon pwisin kinamwe mi sopesopono ngeni noun kewe chon kuno meinisin ikenai.

Ekkoch me neich sia nonnom non neni mi ning me ekinamwe, nge sia mefi osukosuk non netipach. Ekkoch ra mefi kinamwe me unusochun nuwa nukanapen watten netipeta, osukosuk, me sopesoponon weri sossot.

Meni oua fen kuna ewe manamanen kinamwe won mesen emon chon kuno noun Jises Kraist are fen rongorong me non an kapas. Uwa fen kuna fan chommong. Fan ekkoch me non ew rumwen pioing ikewe ew famini ra rongee-no emon chon angang noun Kot ewe a arap ngeni mano.

Uwa chechemeni ai churi emon fefin non ewe pioing fitu ran me mwen a mano ren cancer. Uwa uwei nei kewe ruemon kukkun nengin ar repwe fitiei pokiten ei sister mi murino mi fen pin emon nour sensen Kinter me nom.

Chon an we famini ra rongee-no unukun an ewe pet, ra mochen ar repwe nonnom ren non an kewe amuchunon fansoun won fonufan. Uwa mairu nupwen a pwaata me won ewe pet. A angeu ngeni nei kewe nengin me a affata ika ir io, emon me emon, ngeni chon an we famini. A kapas usun ita nei kewe nengin ir noun mi tekia ar ra esinesin me mwen emon kiwin. A kuna ew anen an epwe apasa och mettoch usun napanapen an emon me emon

aramas me non ewe rum pwe I emon chon kunon ewe Chon Amanau. Ngang mi chok chemeni ewe pochokun, ewe kirekiroch, me ewe tong non neuwan. Me ua chemeni ai mairu ren an amenimen mi pwapwa nupwen mwo a sinei pwe an fansoun non manau a chok mwochomwoch.

A fen angei efeiochun kinamwe seni ewe pristut, nge a fen ngeni kich meinisin ewe kapasen pwarata mi manau pwe an ewe Samon we pwonon kinamwe mi ennet: “Ua fen apasa ngeni kemi ei pun epwe wor kinamwe remi. Fonufan epwe eriaffou kemi. Nge oupwe chok epinukunuk! Ua fen okkufatiw fonufan” (John 16:33).

A fen etiwa an we tingor, usun kich meinisin mi tongeni, ese pwan nifinifin met ach sossot me osukosuk:

“Oupwe feito rei, ami meinisin mi pekus ren choun osemi o ngang upwe asoso kemi.

“Oupwe angei osei o oupwe mwarei o oupwe kaeo seni ei, pun ngang mi mosonoson o tipetekison, iwe oupwe kuna ami ngaseno” Matthew 11:28–29

Seni chok ach tapweno mwirin ewe Chon Amanau pwe kich sipwe tongeni kuna kinamwe me nuwa non ekkewe sossot repwe feito rech meinisin.

Ekkewe iotekin sakrament ra tongeni anisi kich ach sipwe sinei ifa usun sipwe kuna ena kinamwe nukanapen osukosuken manau. Nupwen sia angei ewe sakrament, sia tongeni finata pwe sipwe nikitu ngeni ach kewe pwon mi pin ne tapweno mwirin I.

Emon me emon kich sia pwon pwe sipwe chechemeni ewe Chon Amanau. Oua tongeni finata ami oupwe chechemeni I non ewe napanap mi fich ngeni ami oupwe amara netipemi ngeni I. Fan ekkoch me rei, ina ai upwe kuna I non mokurei an fotopukutiw non ewe ataken

Gethsemane ika ne kuna I an kokkori Lazarus epwe tou seni ewe peias. Nupwen ua fori ei, ua mefi ai arap ngeni I me ew kinisou a wato kinamwe ngeni netipei.

Oua pwan pwon pwe oupwe aneasochisi an kewe annuk. Oua pwon pwe oupwe wata itan womi me oupwe noun chon pwarata. A pwon pwe nupwen oupwe aneasochisi ami kewe pwon mi pin ngeni I, ewe Ngun mi Fel epwe nonnom remi. (Nengini D&C 20:77, 79.)

Ei a wato kinamwe non ru napanap. Ewe Ngun mi Fel a nimeti kich seni tipis pokiten ewe Achasefan an Jises Kraist. Me ewe Ngun mi Fel mi tongeni ngeni kich ewe kinamwe a feito seni an Kot etipew me ewe apinukunukun manau esemuch.

Ewe Aposel Paul a kapas usun ei feioch mi amwarar: “Nge iei ekkewe uwan Ngunupin: tong, pwapwa, kinamwe, engino, umoumoch, manauoch, nikitu” (Galatia 5:22).

Nupwen chon kuno seni nang ra wato porousen uputiwen ewe Chon Amanau, ra apasa, “Mwareiti Kot non nang mi fakkun tekia o *kinamwe* won fonufan” (Luke 2:14; auchean mi kapacheta). Ua apasa ai kapasen pwarata usun emon chon pwaratan Jises Kraist pwe ewe Sam me Noun we Achengicheng ra tongeni tinato ewe Ngun an epwe mut ngeni kich ach sipwe kuna kinamwe non ei manau, met chok sossot epwe tongeni feito rech me ngeni ekkewe kich mi tongeir.

## AFANAFAN SENI EI POROUS

Preseten Eyring a aitikich pwe ekkewe iotekin sakrament ra tongeni anisikich ach sipwe sinei ifa usun sipwe kuna kinamwe fansoun ach sossot. Ra achema ngenikich pwe nupwen sia apwonueta ach kewe pwon mi pin, epwe nom rech an Kot we pwon pwe ewe Ngun mi Fel epwe nonnom rech. Ekieki om kopwe eisini ekkewe ka asukuner ifa usun an ewe Ngun mi Fel nom rech a tongeni anisikich ne awora kinamwe. Ka tongeni pwan aea om ekiek are ew memmef usun an ewe Ngun mi Fel anisuk om kopwe mefi kinamwe non ew sossot. Ka tongeni pesei ngeni ekkewe ka asukuner ar repwe ekipwichi ei porous fansoun ewe sakrament non ei wiik.

## SERAFO

### Ifa Usun Om Kopwe Chechemeni ewe Chon Amanau non Ei Wiik?

**P**reseten Eyring a pesei ngenikich pwe sipwe “finata ach sipwe chechemeni [ewe Chon Amanau] non ewe napanap mi fich ngenikich ach sipwe amara netipach ngeni I.”

Ifa usun kopwe “chechemeni I fansoun meinisin” non unusen ewe wiik (nengeni D&C 20:77, 79)?

Mi wor wokisin pukefel usun ewe Chon Amanau ka kon efich? Ka tongeni esisina ew wokisin mi sokkono iteiten ran non ei wiik me annea ngeni pwan emon.

Ka konu echo konfen are pwan echo kon mi aururu non om ekiek nupwen ka mefi netipengaw? Meni kopwe akkaewin finata echo mi usun ewe Chon Amanau non ei wiik.

Ka ekipwichi usun manauen ewe Chon Amanau me an we achasefanin fangeno fansoun ewe sakrament iteiten wiik? Ka tongeni mwoneta ngeni ewe sakrament ren om achema om finata non unusen ewe wiik om kopwe chechemeni ewe Chon Amanau fansoun meinisin me aier seni ekkewe fansoun nupwen ka weires ne fori.

Ka iotek ren tufichin om kopwe afanafana ewe kapas allim iteiten ran? Sotuni ne awora ew porousen ewe kapas allim a anonga won ewe Chon Amanau non ei wiik. Ka tongeni apasa om kapasen pwarata usun ewe Chon Amanau fansoun pwinin famini are kapas ngeni emon chienom non sukun usun ew om memef a fis me non fan.

Kopwe akokkota om kopwe ekita ne chechemeni ewe Chon Amanau non ew napanap mi auchea non ei wiik. Ureni emon sam ika in, emon pwiim, emon sou emwen, are emon chiechiom usun om we akokkot. Nesoponon ewe wiik, urenir usun met a fis. Ami me ruemon oupwe mefi ewe kinamwe me pwapwa ewe Preseten Eyring a kapas usun.

## SEMIRIT

### Feito ren Kraist

**E**we chon Amanau a fen pwon ngeni kich kinamwe nupwen sipwe “feito [Ren]” (Matthew 11:28). Ei a wewen pwe sipwe tapweno mwirin an nenien appiru me achocho ne nonnom arap ngeni I.

- Kopwe mosonoson fansoun ewe sakrament.
- Fini om kopwe kirekiroch me kosap apungu ekkoch.
- Annea usun ewe Chon Amanau me non ekkewe pukefel.



Nuku, Famini, Aninis

# Pwapwan Famini A Pwa non Wenechar

*Anneani ekkei puk fiti iotek me kutta om kopwe sinei met kopwe aporaus. Ifa ussun om uweiti "Ewe Famini: Ew Esinesin ngeni ei Fonufan" a anapano om nuku non Kot me efeiochu ekkewe ka tumunur ren chon amwa? Ren pwan ekkoch poraus, kopwe no ngeni reliefssociety.lds.org.*

Kot "a forata famini pwe repwe ngeni kich pwapwa, pwe repwe anisi kich ne kaeo ekkewe nongonong mi pung non ew neni mi wortong, me repwe amwonna kich fan iten manau esemuch."<sup>1</sup> Usun an Kot we "kokkotun pwapwa mi auchea" (Alma 42:8), Preseten Russell M. Nelson, Presetenin ewe Mwichen Engon me Ruemon Aposel, a apasa: "An kokkot a affata pwe mwan me fefin ra fis 'pwe repwe tongeni mefi pwapwa' [2 Nifai 2:25]. Ena pwapwa a feito nupwen sia finata ach sipwe nonnom non etipew ngeni an Kot we kokkot esemuch."<sup>2</sup>

Ew imw mi ani nongonong Kraist a awora ekkewe tufich mi napanap ren fetanoch. Elter Richard G. Scott (1928–2015) seni ewe Mwichen Engon me Ruemon Aposel a anapanapa pwe ew neni "ikewe ewe kapas allim a afanafan me ie, pwon mi pin ra pwonueta, me tong a fis," ikewe famini ra tongeni manaueni "ew manauen anneasochis" me winiti mi "nukuchar non ewe kapas allimen Jises Kraist."<sup>3</sup>

Preseten Henry B. Eyring, Aewin Chon Aninis non ewe Aewin Presetensi, a apasa: "Sia tongeni finata

pwe sipwe fori mettoch meini-sin sia tongeni ne watiw ekkewe manamanen nang non [ach] famini." Iwe sipwe kon fen anapa tong, angang, anneasochis, me pwapwa non imwach kewe ren "[an nouch kewe semirit] rorongong ewe kapasen Kot me mwirin sotuni non nuku. Ika repwe fori, nonnomur epwe siwin non ew napanap epwe awora ewe pwapwa ra kukutta."<sup>4</sup>

## ***Imw mi ani nongonong Kraist***

Mi wor ach nenien appirun ren imw mi ani nongonong Kraist me non ekkewe pukefel. Mwirin seman we, Liai, a mano, Nifai a angei an we famini me pwan ekkoch mi nuku non ekkewe aurour me ekkewe pwarata seni Kot me ekkewe ra ausening ngeni an Nifai kewe kapas me uweiarno seni ewe fonuen ekkewe chon Leiman. Non ei minafon neni, ekkewe chon Nifai ra tongeni apwonueta ekkewe kapung, me ekkewe annukun ewe Samon non mettoch meinisins, anongonong won ewe annukun Moses (nengeni 2 Nifai 5:6–10). Nge pwan mwo nein ekkewe chon Nifai, mwirinon ekis fansoun ekkoch ra winiti mi anneasonap.

Me nupwen chochon ach kewe famini ra tongeni rikino fan ekkoch seni wenechar usun ekkewe chon Nifai, Elter Scott a apasa pwe ew imw mi ani nongonong Kraist mi chiwen "awora ekkewe aurouren kinamwe me tumun non imwach kewe." A affata pwe "epwe chok chiwen wor chommong weires are netipengaw, nge mwo nukapanen osukosuk, sia tongeni pwapwaiti kinamwein non netip me wachemuken pwapwa."<sup>5</sup>

## ***Pwan ekkoch Wokisin***

3 John 1:4; 1 Nifai 8:12; 2 Nifai 5:27

### **ESINESIN**

1. *Handbook 2: Administering the Church* (2010), 1.1.4.
2. Russell M. Nelson, "Celestial Marriage," *Liahona*, Nov. 2008, 92.
3. Richard G. Scott, "For Peace at Home," *Liahona*, May 2013, 30–31.
4. Henry B. Eyring, "The Teachings of 'The Family: A Proclamation to the World,'" *New Era*, Sept. 2015, 5, 6.
5. Richard G. Scott, "For Peace at Home," 31.

### ***Ekkieki Usun Ei***

Met sia tongeni fori pwe sipwe kon manau wenechar non ach kewe famini?